

O-zi-iphe

¹ Ọwaa bụ olu O-zi-iphe; mbụ nwatibe Dévidi, bụ eze lẹ Jerúsalemu.

² “Iphemiphe ọbule bụ ori aphụ! Iphemiphe ọbule bụ ori aphụ!” Ono iphe O-zi-iphe ekfu. ³ ? Bụ ngunu bụ uru, madzụ erita l'iphe bụ akanya, oose lẹ mkpuli ẹnyanwu-a? ⁴ Ọgbo ọwaa - lufuta; yo tsee; laa. Ọgbo ọdo etso iya. Obenu lẹ mgboko anọdujelephu ẹge ọ nọ. ⁵ Ọobuje; ẹnyanwu -hata; yo chia; nyihu. Yo gude ọso laphu azụ l'ẹke o shije hata. ⁶ Pherephere epheje laa ọhuda. Yo pheru laa isheli. Yo phee mgburumburu mgburumburu; laphu azụ l'ẹke o shi. ⁷ Iphe bụ nggele, nonu atsoje tsōba l'eze ẹnyimu. Obenu l'ẹnyimu te ejijedu ejiji. Ọ bụru ẹke nggele shi tsofu; bẹ ọotsolataje azụ. ⁸ Ẹ to nwedu iphe ẹ-ta akpatajẹdu ike agvugvu; k'ọphu bụ lẹ madzụ ta atụ-ghedu ọnu iya. Ẹnya te elenyajekwaa iphe; sụ lẹ ya te elehedu; ọphu nchị 'anụnyajekwaa iphe; sụ lẹ ya ta anuhedu. ⁹ Iphe nọhawa nụ; bukwa iya phụ e-mekochaa nọdu. Ọ bụru iphe ono, e mejehawa nụ ono; bẹ ee-me ọdo. Ẹ to nwekwa iphe bụ iphe ọphungu lẹ mkpuli ẹnyanwu-wa. ¹⁰ ?O nweru iphe nonu, madzụ e-gbe sụ: “Lenu! L'iphe ọwaa kwa iphe ọphungu.” O gbe nọduhaakwaru; bẹ ọgbo nk'ayi byaderu. ¹¹ Ndu ọphu nọhawaru nụ; b'ẹ t'a anyatajẹhekwa. Ndu ọphu abyanu; bẹ ọgbo ọphu, tso iya nụ; ta anyatakwa iya phụ.

Mmamiphe bu iphe-mmanu

¹² Mbèdua, bu o-zi-iphe-a shikwa buru lè Jerúsalemu; buru eze ndu Ízurelu. ¹³ Mu eworu obu mu zia; tẹ mu mua iphe gude mmamiphe; chọfuta iphemiphe ọbule, eme lè mkpuli igwe-wa. O bụlephu nsegbu-akanya; bẹ Nchileke meru doberu unwu eliphe t'ẹphe seje. ¹⁴ Mu lewaru ẹnya l'iphemiphe ọbule, eme lè mkpuli ẹnyanwu-wa; phụ l'ẹphe l'ẹphe ha bu ori aphụ. O dụ l'ọ bu onye achi pherephere ọso. ¹⁵ Iphe gberu nggọ b'ẹ te emeghekwa t'ọ kfulu nhamunha;

ọphu 'a gu-ghedu iphe ẹ-ta nọdu nụ l'ọgu.

¹⁶ Mu byawaru bya arĩa ọriri l'onwomu; sụ lè mu mawaru mmamiphe nshinu; maswetakota iphe bu ndu vuhawa mu ọzo buru eze lè Jerúsalemu. Ẹ to nwedụ ẹge mmamiphe; mẹ ọkwenya jeru iya, mu ta mahadua. ¹⁷ Mu abya efube ifu; gvulaha ẹnu mmamiphe; t'o doo mu ẹnya; mbụ tẹ mu maru iphe dụ iche l'ogvu-ememe yele ome-eswe. Iphe mu mutaru aburu l'iphemiphe ọbule ono dụ l'ọ bu ọchi pherephere ọso. ¹⁸ Ishi iya aburu l'iphe oke-mmamiphe ewotaje bu oke-nggumaphu. Yọ buru ẹge madzụ aka ọma iphe l'ẹje; bu ẹge aphụ a-nọdu aka iya atsọtso.

2

Ẹhu-otso-ẹna bu iphe-mmanu

¹ Mu abya arĩa l'ime obu mu; sụ: “Tẹ mu daẹdu ome t'ẹhu tsọo mu ẹna; maẹduru ẹge ọ dụ-tabe mma.” Obenu lè mu megeeru bya amaru

l'ọ bụkwaphu ori aphụ. ² Ọchi ọchi; bẹ mu phụkwaruphu l'ọ bụ ome-eswe. Mu abya elee ọnya l'ẹhu-ọtso-ẹna; jì: “?Nanụ uru, madzụ erita iya?” ³ Mu abya esede t'ọ doo mu ọnya; mbụ iphe a-karu madzụ lẹ mma; lẹ nwa teke ọphu ọ nọkwadua lẹ mkpuli igwe ọwaa. Mu abya eye ẹka lẹ mẹe; k'ọphu mu a-ma iphe ọ bụ; mbụ ome-eswe; teke mbẹdua l'onwomu ta bụdu onye eswe.

⁴ Mu abya eye ẹka l'oke akanya; kpụshiaru onwomu ụlo; gbashia mgbo vayinu. ⁵ Mu agbashia mgbabu; kpụshia ẹke aanọduje atụta ume ye iya; dzashia oshi-ọmi, dụ iche l'iche ye iya. ⁶ Mu abya atushia okpuru, ee-gudeje agba mini l'oshi, mu yeshiru. ⁷ Mu abya agbashia ohu ndu k'unwoke; mẹ ndu k'unwanyị; yeru ohu ndu ọphu a mụshiru mu l'ufu. Mu nweshiru eswi; nweru elu; karia iphe bụ ndu ọphu vuhawa mu ọzo bụru eze lẹ Jerúsalemu. ⁸ Mu abya akpaa mkpọla-ọcha; kpaa mkpọla-ododo; mẹwaru ẹku, shi l'ẹka ndu eze; mẹ l'ẹka ndu ọhodo. Mu abya afọo ọgbo-egvu ndu k'unwoke; mẹ ndu k'unwanyị; byakwaphu bya eworu unwanyị emeje t'ẹhu tsọ unwoke ẹna dophee onwomu mgburumgburu.

⁹ Ya abya akakọta iphe bụ ndu eze, vuhawaru mu ọzo chia Jerúsalemu l'ẹphe ha; gudekwaru mmamiphe mu ẹge mu gude iya. ¹⁰ Ẹ to nwedu iphe ọnya mu phujeru; yọ gụa mu agugu nahujeru mu nụ. To nwekwanu iphe mu maru, e-me t'ẹhu tsọo mu ẹna, mu hajeru ememe. Yọ bụru iya bụ uru, mu ritaru l'akanya, mu ese. ¹¹ Mu abya atọo nwehu gbua igo l'iphemiphe

òbule ono, mu meru ono; yeru òphu mu gude ẹka mu seta; mẹkpo iphemiphe òbule, mu seru akanya iya; bya aphụ l'iphemiphe òbule ono tuko buru ori aphụ; dụ l'ò bụ onye achi pherephere ọso; l'ẹ tọ dudu uru, madzụ ritaru lẹ mkpuli ẹnyanwu-wa.

Mmamiphe; mẹ ome-eswe bụ ori aphụ

¹² Ya ndono; mu abya ezia obu l'alị; rìlahaa kẹ mmamiphe; ọgvu-ememe mẹ ome-eswe. ? Bụ ngunu ọdo; bẹ onye eze ọphungu e-me, ẹ-ta bụdu iphe eze ọdo mehawaru? ¹³ Mu abya aphụa lẹ mmamiphe ka ome-eswe mma; ẹge ono, iphoro ka ọchi mma ono. ¹⁴ Onye maru mmamiphe bụ ẹnya b'o gude aphụ ụzo; onye eswe eru mgboko oru-ìshì. Mu abya aphụa l'ẹphe ẹbo ono tuko nọdu l'ọdu-oshi lanụ: l'ò bụ iphe meru onye ọphu emeje onye ọphu.

¹⁵ Mu abya arià l'obu mu; sụ: “L'ò bụ iphe meru onye eswe e-me mu. ?Nahunu uru, mu ritaru lẹ mu bụ maru mmamiphe?” Mu abya arià ya l'òkpoma mu; sụ: “L'iphemiphe òbule ono tükokwa buru ori aphụ.” ¹⁶ L'ò bụ ẹge a zaharu onye maru iphe bụ ẹge aa-zaha onye eswe; l'ẹ tọ dudu ẹge aa-nọ-be; a zahaa ẹphe ẹbo. Yọ buru ẹge ọnwu gburu onye eswe; bẹ oo-gbu onye mmamiphe.

Akanya bụ ori aphụ

¹⁷ Ọ bụ iya meru iphe ndzụ dụ mu ashị; kẹ l'iphemiphe òbule, eeme lẹ mkpuli ẹnyanwu-wa tuko akpatsu mu aphụ. Iphe ono tuko buru ori aphụ; buru ọchi pherephere ọso.

18 Iphe bu akanya, mu seru le mkpuli enyanwu-wa dukotakwa mu ashi; ke lo bu onye ophu e-tsota mu nu; be mu e-mekochaa haaru iphemiphe obule ono; 19 le bo du onye maru: onye obu; ?oo-bu onye maru iphe; t'oo bu onye eswe. Obenu lo bu onye ono, e-tsota mu nu ono; be e-nwekotaru iphemiphe obule ono, mu doru enya edodo see eza iya le mgboko-a ono. Onanu kwaphu ori aphu. 20 Mu abya atalahaa onwomu uta; su: ?Bu ngunu meru iphe mu ese akanya le phu le mkpuli enyanwu-wa? 21 Le madzu egudeje mmamiphe; gude okwenya; me nka see akanya. E -megee; yo buru onye e-te eridu aphu iya bo se iya edoberu. Onanu kwaphu bu ori aphu; buru ejo iphe ha nshinu. 22 Mb; ?bukpo ngunu; be madzu erita l'akanya; me photophoto, oku; l'erigbu onwiya l'aphu ozi, oje le mkpuli enyanwu-wa. 23 Ke l'oge, madzu no ndzu; bo nokota l'iphe-ehuka; ozi, oje aburu ozi aphu; mbukponu me l'enyasi; be egomunggo ta nodu iya l'ekalanu. Onanu kwaphu ori aphu.

24 E to dudu iphe ka le madzu eri; l'angu ege du iya mma l'iphe o setaru l'akanya. Ono; be mu lekwaruphu enya; phu lo shi Nchileke l'eka; 25 kele ndege e to buru Nchileke; ?bu onye g'a-phuje iphe oo-ri. Temanu; ?bu onye; be eh g'anodu atso ena? 26 Onye eme iphe du Nchileke mma; be onuje mmamiphe; nu iya iphe-odo-enya; nu iya eh-otso-ena. Obenu l'onye, bu ejo madzu bo lojeru ifu ye lokpa eku doberu ndu eme iphe du Nchileke mma. Onanu abukwaruphu ori aphu; buru ochi pherephere oso.

3

Iphemiphe obule nweru ògè

- 1 Iphemiphe obule nweru ògè;
mbu l'iphe bu iphe,
eeme ememe lẹ mkpuli
igwe owaa nweru ògè:
- 2 Ògè oṃu madzụ nọ;
ògè anwuhu anọdu.
Ògè omebe iphe l'alị nọ;
ògè okpata iphe anọdu.
- 3 Ògè egbugbu nọ;
ògè ome t'a korohu anọdu.
Ògè okukposhi iphe akukposhi nọ;
ògè okpu iphe akpukpu anọdu.
- 4 Ògè ora ekwa nọ;
ògè ochi anọdu.
Ògè oḡu aphụ nọ;
ògè ote egvu anọdu.
- 5 Ògè otufashi mkpuma nọ;
ògè otutukobe mkpuma anọdu.
Ògè onmata akpa nọ;
ògè ba anma akpa anọdu.
- 6 Ògè ocho iphe achochi nọ;
ògè oswe enya l'iphe anọdu.
Ògè okwakobe iphe nọ;
ògè otufashi iphe anọdu.
- 7 Ògè olakashi iphe alakashi nọ;
ògè oḡbakwa iya agbakwa anọdu.
Ògè onodu nggijingiji nọ;
ògè oye okfu okfu anọdu.

⁸ Ògè oye obu nọ;
 ògè ọdu ashị anọdu.
 Ògè ọgu nọ;
 ògè ẹhu-agu anọdu.

⁹ ? Bu ngunu bu uru, onye akanya erita l'akanya, oose? ¹⁰ Mu phukwaru ivu, Nchileke boru unwu eliphe. ¹¹ Lẹ Nchileke doru ẹnya ndo; mee iphemiphe ọbule dobetsua l'ògè iya. Yọ bya emee madzụ t'ọoritaje ojejoje. Obenu lẹ madzụ ta dudu ike ọmaeberu iphe Nchileke meru; tsube l'ishi jeye l'ẹke o jeberu. ¹² Mu amaru l'ẹ tọ dudu iphe ọdo, katsuaru madzụ mma ọdo, ẹ-ta bụdu t'ẹhu tsoje iya ẹna; yo meje iphe dụ mma teke ọ nọ ndzụ. ¹³ T'onyenonu riye ẹge ọ gu iya; yọ nguje ẹge ọ gu iya; akanya, oose edzuaru iya. Ọ bu onanu bu iphe-ọma, shi Nchileke l'ẹka.

¹⁴ Iphe doru mu ẹnya bu l'iphemiphe ọbule, Nchileke meru; a-nọ jeye lẹ tutu yoyo. Ẹ tọ dudu iphe ee-yekwa iya eyekwa; tọ dụ ọphu ee-wofu iya ewofu. Iphe meru iphe Nchileke meru iya ẹge ono bu k'ọphu madzụ e-gude iya atsụ yebe Nchileke egvu. ¹⁵ Iphe bu iphe nonu shihaakwa nọdu. Iphe bu iphe a-nọdu nọ nọhaakwa. Yọ bụru Nchileke emeje t'a nyata iphe shi nọduhawanu.

Ejo iphe jiru mgboko

¹⁶ Ma abya apha iphe ọdo lẹ mkpuli ẹnyanwu-wa: L'ẹke gbaru t'e kpee ikpe, dụ maa bu akirishi b'a phuru iya. Ẹke a g'aa-nọdu eme iphe vudo nhamunha bu ejo iphe b'a nọ iya eme. ¹⁷ Mu arija; su: "Lẹ Nchileke e-kpee ndu doberu ẹka ndoo; lẹ ndu akirishi ikpe; kẹ l'iphemiphe

ọbule nweru ògè nk'ia; iphemiphe ọbule, eeme ememe enweru teke eemeje iya.” ¹⁸ Mu abya arià ọdo; sù: “Lẹ Nchileke adatajẹkwa madzù adata; gude koshi ẹphe l'ẹphe l'anụ-ẹgu-ẹgbudu bụ iphe lanụ.” ¹⁹ Ọ bụ ẹge ọ dū madzù b'ọ dū anụ-ẹgu-ẹgbudu. Ọ bụ iphe lanụ tuko ẹphe ẹbo swiru; kẹ l'ọ bụ ẹge ọnwu egbu madzù; bẹ oogbu anụ-ẹgu-ẹgbudu. Yọ bụru ẹge ọphu atụ ume; bẹ ọphu atụ. Madzù te gbe kadu anụ-ẹgu-ẹgbudu mma. Iphemiphe ọbule tuko bụru ori aphụ. ²⁰ Ẹphe l'ẹphe ha tuko ala l'ẹkalanu. Ẹphe l'ẹphe ha tukuru shi l'ẹja. Yọ bụru l'ẹja; bẹ ẹphe chiko ala. ²¹ ?Bụ onye maru mẹ ume madzù; ? ọolaje l'eli l'oswiya; k'anụ-ẹgu-ẹgbudu ala l'alị. ²² Ya ndono; mu eleebe ẹnya l'iphe ono; phụ l'ẹ to nwedu iphe ọdo, karu madzù mma ọdo; gbahaa t'ẹhu tsoje iya ẹna l'akanya, oose; kẹ l'ọ bụ iya bụ òkè-iphe iya. Ishi iya aburu; ?bụ onye ha k'odulata iya azụ; t'ọ phụ iphe e-me nù teke o gbeshitsuaru.

4

¹ Mu abyakwaphu bya elee ẹnya; phụ ẹhu, unwu-eliphe akpa ibe ẹphe lẹ mkpuli ẹnyanwu-wa. Mu abya aphụ ẹnya-mini ndu aakpa ẹhu; to nwe onye a-sù ẹphe gberuma. Yọ bụru ndu ono, akpa ẹphe ẹhu ono; bẹ ike nọ l'ẹka. Obenu l'ẹphebedua te nwedu onye a-sù ẹphe gberuma. ² Mu asù lẹ ndu ọphu ọnwu gbuwaru; bụ iya bụ ndu ọphu nwuhuwaru anwuhu; bẹ ẹhu kakwa ọtso ẹna; mẹ lẹ ndu ọphu nọkwadu ndzù. ³ Obenu l'ime ọmadzù ẹbo ono; bẹ onye ọphu nk'ia ka mma bụ onye ọphu ẹ-ta amụdua

amumu; mbu onye ono, e-ta phudua ejo iphe eemebe le mkpuli enyanwu-wa.

⁴ Ya ndono; mu aphu l'iphe bu akanya, madzu ese; me iphemiphe obule, madzu dzutaru edzuta tukoru shi l'okopho, madzu ekoru ibe iya. Onanu abukwaruphu ori aphu; buru ochi pherephere oso. ⁵ Onye eswe achijeru eka ye l'ifu utakfu; taa nvo-eka iya. ⁶ Obenu l'o kakwa mma l'e nweru iphe jiru ogbogbo-eka lanu; ehu adu madzu agu; me l'a kwaru l'ose akanya; t'eka labu ji, bu ochi pherephere oso.

⁷ Mu abyakwa bya aphua l'iphemiphe obule le mkpuli igwe owaa bu ori aphu: ⁸ O nweru nwoke ophu, bu onye nkinyi: e to nwedu nwata nwoke; to nwe nwunne ke nwoke. Obenu l'e to senyajedua akanya t'ike gvu iya; ophu iphe o setaru 'edzujedu iya edzudzu. Ophu o nwebudua mboku, o jjeru onwiya: “?Bu onye; be ya eriru aphu owaa? ?Bunua ngunu meru iphe ya anashi onwiya ehu-otso-ena ege-a?” Onanu kwaphu ori aphu; buru nsegbu-akanya.

⁹ Odu ebo kakwa mma; me l'odu nkinyi; ke l'umadzu labu a-kakwa onye lanu oseta iphe. ¹⁰ Ke l'onye lanu -daa; ibe iya a-palia ya; olobu; nshoo onye nkinyi; kele teke o daru b'e to nwedu onye a-pali iya nu. ¹¹ Odo bu l'umadzu labu -zeru l'oshi; be ehu a-ka epehe ovo oku. Obenu l'onye lanu -zeru nkinyi iya; ?nanu ege ehu e-shi evo iya oku? ¹² O -buru onye lanu; be eemekputaghekwa iya. Obenu l'a -du ebo; b'e te emekputaghekwa iya; ke l'okpukpu, a jigbaru eto swia; be agbabu iya dukwa ehuka.

13 Nwokorọbya, ẹ-te nwedu iphe; maru iphe kakwa mma; mę l'ọgurenya, bụ eze; to nwe egomunggo; bụru o-kfu-nk'iya; anụ nk'iya; 14 m'ọ -ruhuru nwokorọbya ọbu shi l'ọka-mkpọro; m'ọ bụ l'ufu ndu ụkpa bya aburu eze. 15 Mu elee ẹnya; phụ l'iphe bụ madzụ lę mkpuli ęnyanwu-wa hehuwaru tsoru nwokorọbya ono, onye eme tę ya nọdu l'ọzori nwoke ọgurenya ono. 16 Ndu wụ-lihuru tsoru iya bụkwa 'aguta aguta. Obenu l'ọgbo ọphu e-mekochaa bya nụ te ekweddu l'ọ nweru iphe nwokorọbya ono meru, dụ mma. Onanu abụkwaruphu ori aphụ; bụru ọchi pherephere ọso.

5

Tsuje Nchileke egvu

1 T'ęnya rukwa ngu alị teke i je l'eze-ulo Nchileke. Ọ kakwa mma t'i je angabę nchị; mę l'ọ je ogwo ęja onye eswe; kęle ndu eswe ta amadụ teke ęphe eme ęji. 2 T'ire ba atsunukakwa ngu nkọ; ọphu iimenukakwa ęwegwa okfu okfu l'ifu Nchileke; kęle Nchileke bukwa l'imigwe; nggubedua anọdu lę mgboko-a. Ọo ya bụ; t'i gujekwa okfu ngu ọgu. 3 Ọ bụ ęge aaroje nrọ teke aarị ọriri nshinu bụ ęge mkpọkoro okfu ahaje nshinu l'igweligwe okfu. 4 Teke i kweru Nchileke ụkwa; be edokwa iya l'ulori ememe; kęle ndu eme eswe ta adujekwa Nchileke mma. Mekwaa iphe i kweru ụkwa iya. 5 Ọ kakwa mma l'ę tii kwedu ụkwa ilile; mę l'i kweeberu iya; ti mehe iya. 6 Be ekwekwa t'ọnu ngu duba ngu l'iphe dụ ęji. Ọphu ị sụkwa onye ęje ozi l'eze-ulo

Nchileke l'ukwa, i kweru bukwa onu garu ngu uga; ke l'iphe ono nwekwaru ike ghua Nchileke eghughu; yo mebyishia iphe i mekotahawaru. ⁷ Nro -ghata l'igwe; mkpokoro okfu azaa azaza. Oo ya bu ti gbe tsujekwa Nchileke egvu.

Èku bu iphe-mmanu

⁸ I -nodu le mkpukpu; phua l'unwu ogbee; be aakpa ehu; t'e ekpe ikpe, du maa; t'e meru madzu iphe gbaru t'e meeru epe; t'e b'o dukwa ngu biribiri; ke l'onye, ha nshinu; be onye odo, ka nshinu anodujekwa muberu enya. Obenu l'o nwejekwaphu ndu odo akakotaje epe ebo ono nshinu.

⁹ Iphe e meberu l'ali; be uru iya bukwa k'onjemonye obule. O kwaphu ege ono; be eze l'onwiya eritajekwaphu uru l'iphe egwotaru l'egu.

¹⁰ Onye yeru okpoga obu; b'e to nwekwa egbe okpoga, oo-kpata, e-dzuru iya nu. Ege ono kwaphu b'o du onye yeru eku obu: uru, o ritaru iya te edzujekwa iya. Ono bukwaphu ori aphu.

¹¹ Obuje eku abya; ndu e-ri iya nu abyakwaphu. ?Bu uru ngunu b'o buru onye nwe iya nu e-ta buleduaphu t'o le iya l'enya? ¹² Onye akanya; be mgbenya iya e-gujekwa egugu; m'o -riru nshinu; m'o -riru nwanshi. Obenu l'oke eku akpojekwa onye nwe iya nu mgbenya.

¹³ O nweru akpamara, mu phuru le mkpuli enyanwu-wa: L'eku; be onye nwe iya nu kparu dobe; yo buru iphe agbuswashi iya ehu.

¹⁴ Obenu l'a nonyaaru; eku ono l'o ha alakota l'iyi; k'ophu bu l'e to nwedu ophu o haru nwatibe

iya. ¹⁵ L'ọ kwa ẹge ọ gba ẹka; shi l'ẹpho nne iya; bu ẹge ọo-gba iya la. Ẹ to nwedu iphe shi l'akanya ono, oo-gude ala. ¹⁶ Ọwaa bukwaphu ẹjo akpamara: Mbụ l'ọ bu ẹge ọ dọ bya; bu ẹge ọo-dọ ala. ?Bu uru ngunu b'o ritaru l'akanya, o seru doberu pherephere? ¹⁷ Ndzụ iya b'ọ nọkotaru l'ishirishi; nọdu l'iphe-ẹhuka takọta kpọkpokpo; l'iwe.

¹⁸ Yọ bya edoo mu ẹnya l'ọ dọ mma tẹ madzụ rijee; yọ ngua ẹge dọ iya; túsaru ẹhu l'akanya, oose lẹ mkpuli ẹnyanwu-wa lẹ nwoge ọphu Nchileke nuru iya; kẹ l'ọ bu ono bu òkè-iphe iya. ¹⁹ Ọdo aburu l'iphe bu onye, Nchileke nuru ẹku; mẹ iphe-enweru; bya anu iya ike, oo-gude ria ya; mbụ onye duru ike nata òkè ọphu o keru nu iya; t'ẹhu tsojekwa onye ono ẹna l'akanya oose; l'ono kwa iphe-oma, shi Nchileke l'ẹka. ²⁰ Egbe onye ono ta adukwa teke ọonoduje k'ori ẹge ọ duru iya; kẹle Nchileke emeje t'ẹhu tso iya ẹna tekenteke; ọphu ọzo 'adujedu iya k'ori ọriri.

6

¹ O nwekwaruphu ẹjo iphe ọdo, mu phuru lẹ mkpuli ẹnyanwu-wa. Iphe ono aburu iphe anyi-gbu madzụ anyi-gbu: ² Lẹ Nchileke emeje tẹ madzụ nweru ẹku; mẹ iphe-enweru ọdo; bya emekwaa ya phụ t'ọ buru onye, aakwabe uguv; k'ọphu bu l'ẹ to nwedu iphe agụ iya nu, akọ iya ọko. Obenu lẹ Nchileke te ekwejedu t'o ria ya; yọ bu-chiaru onye ọhodo e-ri iya. Ono bukwaphu ori aphi; buru akpamara.

³ Ọ -buru lẹ madzụ mụshiru unwu; mụta ẹphe ọkporo ise; bya akaa nka lilihu alilihu; to ri ẹku

ono, o seru akanya iya ono; te li iya ọkpobe elili; be mbedua sukwaru le nwa, no nne iya l'epho nwuhu kakwa iya mma. ⁴ Egbe nwata ono; be ije, o byaru bukwa ori aphu; ke l'o laru l'abalishi. Nwata ono; be epha iya phuhuru l'ekpuru-ochi. ⁵ A makwaru-a le nwata ono ta phudu enyanwu; to nwe iphe o maru. Obenu l'o ka nwoke phu onweru ehu-agu; ⁶ m'o -ruhuru nwoke ono kaa nka no-sweta unu afa ise; to ri eku, o setaru; ke l'oo ekalanu; be ephe chiko ala.

⁷ Iphe bu akanya, madzu ese esese bukwa onu b'e seru iya. Obenu l'onu te erinyajedua; su l'o jiwaru iya. ⁸ ?Bu ngunu; be onye maru iphe gude ka onye eswe? ?Bu ngunu; be onye ukpa erita l'o maru ojibe onwiya ejibe l'ifu madzu? ⁹ Iphe madzu gudewa l'eka kakwa mma; me l'ophu agu iya agugu enweru. Ono bukwaphu ori aphu; buru ochi pherephere oso.

¹⁰ Iphe bu iphe nonu nwehaakwaru epha; iphe madzu bu b'a mahaakwaru l'oo iphe ono; be ooburu. Madzu; ?l'oo-je obaru onye ka iya nu mbà to. ¹¹ Okfu -paa l'igwe; mkpokoro iya aka nshinu. ?Nanu uru, madzu ritaru l'egbe iphe ono? ¹² Ndzụ madzụ dụ mkpirikpi; to nwe iphe o bu. Oophuhuje l'o bu nwonyonyo ?O nweru onye maru iphe e-menu me madzu nwuhutsua?

7

Mmamiphe

¹ Epha oma kakwa ọkpobe manụ-mbeleke; mboku, madzu nwuhuru aka mboku, a muru iya amumu mma. ² Oje l'ulo-ekwa kakwa mma me

l'oje l'aji; ke l'anwuhu bu iphe noru madzu kpaa gboo. Te ndu ophu no ndzu nyatajekwa l'o bu ege ono b'o du.

³ Aphu kakwa mma; karia ochi ochi; ke l'eeshije l'oswinwu ifu; mee t'obu tusahu madzu atusahu.

⁴ Eke obu onye maru iphe anoje bu l'ulo-ekwa; obenu l'eke obu onye eswe anoje bu l'eke eeri iphe.

⁵ Ongabe nchi le mba, onye maru iphe aba kakwa mma; me l'ongabe nchi l'egvu, ndu eswe agu.

⁶ O kwa ege nku-ogvu anoduje agba kpingu kpingu kpingu l'oku, eeshiberu ite bu ege ochi, onye eswe achi aduje. Ono bukwaphu ori aphu.

⁷ Onye maru iphe l'eme madzu mmegbu buakwa onye eswe; yo buru ege ono; be eka-azu emebyije obu madzu.

⁸ Teke e megewaru iphe emege kakwa mma; me le teke aawata iya awata.

Ota nshi aka mma; me l'oku onwonye ekuku.

⁹ Ba abukwa onye obu-oku; ke l'o kwa onye eswe edoje okfu l'okpoma.

¹⁰ Ba asukwa: "?Bunua ngunu meru iphe oge ndiche ka mma; karia nta-a?" Ishi iya aburu l'egbe aji ono bu aji eswe.

¹¹ O kwa ege eku, shi le nna sweeru nwa du; be mmamiphe dukwaphu. Mmamiphe egbochitaje onye nweru iya nu ¹² ege okpoga egbochitaje onye nweru iya nu. Obekwanu l'eke mmamiphe gude ka bu l'onye nweru iya nu akaje nka.

¹³ Lewaru enya l'oru Nchileke: ?Bu onye a-du ike mee iphe Nchileke meru; yo gbee nggo t'o

bya evudo nhamunha? ¹⁴ Ụboku -duru ngu ị
mma; tejekwa ẹswa; ụboku -dukwanuru ngu ị
njo; nyatakwa l'ọ bu Nchileke, meru ụboku oma;
kwaphu iya meru ẹjo ụboku. Oo ya bu l'ẹ to
nwedu onye maru iphe a-muru iya nu l'uzo ifu.

¹⁵ Ị ị mkpọkoro ndzu-wa, mu no-wa; be
mu tukookwa iphe-a ephe ẹbo phukota: Mu
phukwaru onye doberu ẹka ndoo; yo laa
l'odobekwa-ndoo ya; bya aphukwaaphu ẹjo
madzu; yo ka nka; l'eme ẹjo iphe l'ẹje. ¹⁶ Be
edobenukakwa ẹka ndoo; ophu ị manukakwa
iphe. Ono kwa oye onwongu ọru ¹⁷ Ba
abunukakwa ẹjo madzu; ophu ị bukwa onye
eswe. ?Bụ ole bu k'ogbu onwongu l'oge ngu ẹbe
eru. ¹⁸ Ophu ka mma bu t'i gudeshia ophu iigude
ike; ophu ị hakwa ophu; ke l'onye atsu Nchileke
egvu; be iphe oome ekejekwaru iya.

¹⁹ Mmamiphe emekwa onye maru iya nu t'ọ
ka umadzu iri, achi mkpukpu ike.

²⁰ Ị to dukwa madzu nwigbaleke-oma, no ị
mgboko-a, a-su ị ya doberu ẹka ndoo; ị ya te
mebua iphe du ẹji.

²¹ Ba angabebekwa nchi l'iphe bu iphe
ndiphe ekfu; odumeka; be ii-mekochakwaa nu
l'ẹke nwozi ngu ekfuru ngu ẹjo okfu; ²² kele
nggubedua l'onwongu makwaru-a l'i kfuwaru
ndu ọdo ẹjo-okfu ugbo olemole.

²³ Iphemiphe obule-a; be mu gudewa
mmamiphe lelee; ribua ị mu a-maru iphe.
Obenu ị mu jeru iya okobe ẹka; ike ta du mu.
²⁴ Mu amaru l'iphe ono, bu mmamiphe ono noru
ote-nya; bya adu ogvu ogvu; k'ophu bu l'ẹ to

nwedu onye adu ike achọ-vu iya. ²⁵ Mu abya efuberu mmamiphe ifu; bya eyeru ehu l'ome te mu maru: Mu a-cho-vu mmamiphe; me ege iphe shi eje le mgboko-a; odo aburu te mu maru ege ome akirishi; me ome ririri; du-tabe eswe.

²⁶ Mu apụa iphe ka anwuhu otso ile; mbu nwanyi, obu iya bu onya; buru ugbu, eegude ahata ndiphe. Eka iya du l'obu mkpakobe, oogudeje atuko onye, oburu yele iya. O bu onye eme iphe du Nchileke mma a-nahughe egbe nwanyi ono. Obenu l'onye iphe du eji; be oohataje l'onya iya. ²⁷ O-zi-iphe suru: "Ngabeduduphu! Owaa bu iphe mu puhwaru: Mu ewotaje iphe lanu yekobe l'odo; chiko ephe tugbabe; ege ee-me te mu maru ege iphemiphe obule eje eje. ²⁸ Yo buru teke ono, mu achọ iya; to du iphe mu puhuru ono; be mu puhuru ndu du unu labu l'ukporo iri; yo buru nwoke lanu bu iya onye obu guru iphoro. E to dudu m'ọo nwanyi lanu, mu puhuru, bu onye obu guru iphoro l'ime ephe. ²⁹ Iphe mu cho-vuru nwenkinyi aburu le Nchileke meru madzu t'ọ buru onye obu guru iphoro. Obenu le madzu wataru ocho ejo ọzo."

8

¹ ?Bu onye suru le ya bu onye maru iphe? ?Bu onye bu onye iphe doru enya? O kwa mmamiphe emeje t'ifu busahu madzu ebusahu; yo mekwaaphu t'ifu ba swinwushi madzu aswinwu.

Mejekwa iphe onye eze kfulu

² Mejekwa iphe eze sūru t'e mee. Iphe kparu, iphe mu ekfu iya ẹge ono kwa l'i riburu l'ifu Nchileke l'ii-me iya. ³ T'ẹ b'o vujekwa ngu ẹhu ọlufu l'ifu eze; ọphu i vudojekwa l'iphe dū ẹji; kẹ l'ọ bukwa iphe dū iya mma; bẹ oo-me ngu. ⁴ Keshinu ọ bụ eze bụ o -kfugee-ọ-gvu; ?bụ onye ha k'oji ya iphe oome. ⁵ Iphe bụ onye, eme iphe eze kfuru be mkpa taa kpakwa; nji taa ji iya. Yọ buru onye maru iphe; bẹ maru teke oo-me iphe o kfuru; mẹ ẹge oo-gude mee ya. ⁶ A makwarua l'iphe-ẹhuka, madzū eje; ka iya ẹkuku. Ọ bụ l'iphemiphe ọbule nwekwaru ọgè; bya enweru ẹge eegudeje eme iya. ⁷ Keshinu ọphu madzū ta madu iphe e-me echile; ?bukwanu onye; a-sū iya l'ọo iphe e-mekochaa mee ndọ-ọ. ⁸ Ẹ tọ dudu onye a-dū ike lọ-gudeghee pherephere, bukwa nū ẹge ẹ-tọ dudu onye a-dū ike gudeghee ndzū iya mbọku, anwuhu byaru. Ọ bụ ẹge ẹ-to nwedu onye aagufuje t'ẹ b'o tso je ọgu teke ọgu daru; bụ ẹge ẹ-to nwedu l'ome iphe dū ẹji ahaa ndu eme iya nū.

Ejo madzū; l'onye, doberu ẹka ndoo

⁹ Iphe ono l'ọ ha; bẹ mu phukotaru teke mu woru egomunggo zia l'iphe bụ iphe eme lẹ mkpuli ẹnyanwu-wa. Mbū l'o nweru teke ndu ishi anọduje emegbu ndu nọ ẹphe l'ẹka emegbu. ¹⁰ Mu abya aphua ẹke eeli ndu akirishi; mbū ndu ono, shi anọduje agba evuze evuze l'eze-ulo Nchileke; aajakposhi ẹphe l'ime mkpukpu ono, ẹphe shi nọdu eme ejo iphe ono. Ono bukwapu ori aphū.

11 Ọriri ẹjọ iphe jiru ndiphe obu; okfu l'ẹ ta ahùjedù ẹphe àhùhù ọphu ẹphe mehawaru. 12 Ẹ to nwekwa mẹ ẹjọ madzù; ?o meru ẹjọ iphe ugbo ọkporo ise; bya akaa nka yeru iya; iphe mu maru bụ l'onye atsu Nchileke egvu; l'akwabẹ iya ugvu; bẹ ọo-karu lẹ mma. 13 Obenu lẹ ndu akirishi b'ẹ to nwedu iphe ẹphe byiberu ẹka ekeru nù. Ẹphe ta aka nka; okfu l'ẹphe ta atsu Nchileke egvu. 14 O nweru aphụ ọdo, eeri iphe lẹ mgboko: Iphe ọbu bụ lẹ ndu doberu ẹka ndoo anatajẹ ụgwo, a ga akfù ndu ẹjọ madzù; ndu ẹjọ madzù anata iphe gbaru ndu doberu ẹka ndoo. Ono; bẹ mu sụkwaruphu l'ọ bụ ori aphụ.

15 Ọ bụ iya; bẹ mu sùru l'ọ ka mma t'ẹhu tsoje madzù ẹna; kẹ l'ẹ to nwedu iphe ọdo, karu madzù mma ọdo lẹ mkpuli ẹnyanwu-wa, ẹ-ta bụdu t'o riye ẹge ọ gùru iya; ngua ẹge ọ gùru; ẹhu atsoje ya ẹna. Ọo ya bụ; ẹhu-ọtso-ẹna aburu nk'iya l'akanya, oose lẹ ndzù-a, Nchileke nuru iya lẹ mkpuli ẹnyanwu-wa.

16 Teke mu woru egomunggo zia l'ẹge ee-me tẹ mu maru iphe bụ mmamiphe; mẹ t'o doo mu ẹnya; mbụ iphe bụ akanya, madzù ese lẹ mgboko-a; mbụ ẹza ono madzù seru eswe; l'ẹnyashi; mgbenya aruhu iya ono; 17 bẹ mu bya aphụ iphemiphe ọbule, Nchileke meru; maru l'ẹ too nwedu onye iphe eme lẹ mkpuli ẹnyanwu-wa edoebe ẹnya. Ọ bụ oswi-okfu lẹ madzù e-me nta; mee imo t'iphe doo ya ẹnya; obenu l'ẹ too dodu iya ẹnya. Mbụ l'onye mmamiphe -sù lẹ ya maru iya; b'ẹ to dokwa iya ẹnya ọkpobe edodo.

9

¹ Mu abya awata ọri iphe ono l'ọ ha; bya aphu lẹ ndu doberu ẹka ndoo; mẹ ndu maru iphe; mẹ iphemiphe ọbule, ẹphe eme bu Nchileke b'ọ nọkota l'ẹka. Obenu l'ẹ to nwedu onye maru ọphu e doberu iya: ?bu n-yemobu; t'ọ bu mkpomasashi. ² Ẹphe l'ẹphe ha bu iphe lanu amukota l'ẹhu ẹphe; bu iya bu ndu doberu ẹka ndoo; mẹ ndu akirishi. Ọ bu ẹge ọ du l'ẹhu onye eme ọhuma; b'ọ du l'ẹhu onye eme ẹji; buru ẹge ọ du l'ẹhu ndu edo nsọ; b'ọ du l'ẹhu ndu ẹ-te edodu nsọ; buru ẹge ọ du l'ẹhu ndu erije nte; b'ọ du l'ẹhu atsụ egvu ori nte. ³ Ọwaa bu iphe du ẹji l'iphe bu iphe tuko amu lẹ mkpuli ẹnyanwu-wa: Iphe ọphu bu l'ọo iphe lanu tuko amu l'ẹhu onyemonye ọbule. Ọphu ka ẹji aburu l'ọo ẹjo iphe; mẹ ọgvu-ememe ejije madzu obu teke ẹphe nọ ndzu; e -megee; ẹphe alaa maa. ⁴ L'iphe bu onye nọ ndzu nwekwaruphu iphe oole ẹnya iya; kele nkuta, nọ ndzu kakwa agu, nwuhuru anwuhu mma. ⁵ Ishi iya aburu lẹ ndu ọphu nọ ndzu marua l'ẹphe e-mekochaa nwuhu. Obenu lẹ ndu nwuhuru anwuhu te nwedu ọphu ẹphe makwaduru; ọphu 'onwedu obunggo, ẹphe nwekwaduru; anyata b'ẹ te gbe anyatahedu ẹphe ọdo. ⁶ N-yemobu ẹphe; ndumashi ẹphe; mẹ okopho ẹphe bukotawa ọ-garu l'azu. Ẹ to nwedu l'ẹphe eyekwadia ọnu l'iphe bu iphe eme lẹ mkpuli ẹnyanwu-wa ọdo.

⁷ Ọo ya bu t'i je eria nri ngu l'ẹhu-otso-ena. Nngu egude ungara ngua mee ngu; ke l'ọ kwa nta-a; be iphe iime du Nchileke mma. ⁸ Yejekwa uwe ọcha; ọphu ihajekwa oji manu, eshi mkpo

l'ishi. ⁹ Tẹ nggu ẹ nyee ngu, bu nwanyi ono, i yeru obu ono shimajekwa eshima l'iphe bu ẹge unu a-no-bebe ndzu ẹ mkpokoro ndzu-wa Nchileke nuru unu ẹ mkpuli ẹnyanwu-wa. O kwa ẹhu-otso-ena ono bu okè-iphe ngu ẹ ndzu-a me l'akanya ono, i segbu onwongu ẹ mkpuli ẹnyanwu-wa. ¹⁰ Iphe bu iphe ẹka ruberu ngu; nggu egude ike ngu l'ọ ha mee ya; ke l'ili, ẹke jila; be ozi; idzu ẹge ee-me iphe; okwa-ẹnya; me mmamiphe ta nokwa.

¹¹ Mu abya aphukwaaphu iphe odo ẹ mkpuli ẹnyanwu-wa: L'ẹ to budu onye ka oso agbataje oso; to bu onye ike ka; be emekputaje nu l'ogu. E to bukwa onye ka mmamiphe; akaje onweru nri. To bu onye, ka omaru iphe; akaje onweru iphe; ophu o budu onye, ka omaru ekwo; be iphe akaje agaru. Ephe l'ephe ha eketaje okè l'iphe-oma; me l'iphe-ehuka. ¹² Odo bu l'ẹ too nweddu onye amaje oge nk'iya. O bu ẹge ono, eegudeje ejo ugbu hata ema; gude onya hata nwenu ono; bu ẹge ejo-uboku adakfutaje ndiphe bu ophu awoje ephe kpachingu teke ephe te eledu ẹnya iya.

Mmamiphe kakwa ome eswe mma

¹³ Mu abya anodukwaphu ẹ mkpuli ẹnyanwu-wa; phu iphe mmamiphe meru; yo du mu biribiri. ¹⁴ L'o nweru mkpukpu, ha nwanshi, ndu bu iya nu ta hadu nshinu. Eze, agburu-ehu no abya afuaru mkpukpu ono; gude ndu ogo yechia ya. ¹⁵ Yo nweru nwoke lanu, bu ẹ mkpukpu ono. Nwoke ono bu onye ukpa; obu l'ọ bu onye maru iphe; buru iya mekocharu gude

mmamiphe iya dzofuta mkpukpu ono. Obenu l'ẹ to nwebua onye nyataru nwoke ono, bu onye ukpa ono. ¹⁶ O bu iya meru iphe mu suru: "Le mmamiphe ka agburu-ẹhu mma." Obenu l'onye ukpa b'ẹ ta gubedu mmamiphe iya iphe; okfu iya ta du onye eye iya onu. ¹⁷ Okfu onye maru iphe toru nwehu kfua kakwa mma ongabe nchi; me le gbagbagba, o ra mbu onye ishi, achi ndu eswe ara. ¹⁸ Mmamiphe kakwa ngwa-ogu mma; obenu l'onye lanu eme eji emebyishikwa iphe du mma nshinu.

10

¹ Ijiji, nwuhuru anwuhu, dalahuru le manumbeleke emeje iya; yo shi ejo nshi. O kwaphu ege ono; be umere onye eswe; m'o -ruhuru o ha nwanshi ihagha akangoje mmamiphe; me uguv madzu.

² Uche onye maru iphe anoduje edu iya eye l'iphe vudo nhamunha. Obenu l'uche onye eswe anoduje edu iya eye l'iphe du eji. ³ E to nwedu m'o -ruhuru; o buru l'echi-esu-uzo; be onye eswe eje; be ookoshije le ya te nwedu egomunggo. Yo gude umere iya koshi onyemonye obule le ya bu idiga-akpashi.

⁴ O-buru l'ehu ghulahaaru onye ishi, achi nu eghughu l'eke i no; ba aswikwa uswi; haa iphe iime; tugbua. Dakwaa ash; ke l'obu-odoo emejekwa t'onye e mesweru lee pashia.

⁵ O nweru ejo iphe mu phuru le mkpuli enyanwu-wa. Iphe ono aburu emeswe ndu, bu ishi anoduje emesweshi. ⁶ L'eewotaje onye eswe dobe leze okwa; wota onye ophu nweru iphe

dobe l'okwa, ha nwanshi. ⁷ Mu phụakwaru ẹke ndu, bụ ohu agba ịnya; ụnwu eze egude okpa l'eje l'ọ bụ ohu.

⁸ Ọ kwa onye tūru nsụ adalahuje iya; bụru onye pyoru ẹpoto ụlo; bẹ agwọ atajẹ. ⁹ Ọ kwa onye akukposhi mkpuma b'ọ gbajẹ; bụru onye awa nkụ ezejeru mgbabata iya. ¹⁰ Ọ - bụru l'ogbu-nkụ ta atsudu nkọ; onye awa iya nū ta ba iya ababa; k'ike b'e gudeje awa iya nku. Obenu l'ọ bụ mmamiphe emeje t'iphe madzụ eme nweru ishi. ¹¹ Ọgwu, madzụ agwọ t'agwọ ba ata iya; te erekwa; m'ọ -bụru l'agwọ taoduru iya jederu l'ogwu. ¹² Okfu, shi onye maru iphe l'onu ewotajeru iya ugvu. Obenu l'onye eswe egudeje onu iya kfuta iphe egbu iya nū. ¹³ Onye eswe egudeje iphe ẹ-te nwedu ishi wata okfu iya. Iphe oogudeje kpọ-chia ya ishi aburu kpurupyata. ¹⁴ Okfu onye eswe abuje ogodo-orikoro. Ẹ to nwedu onye maru iphe e-me echile; ?bụ onye, a-dụ ike kfuru iya iphe e-mekochaa mụa ya l'azụ.

¹⁵ Akanya, onye eswe ese b'o sejeru ike-agvugvu nū onwiya; tọ mahe ụzo ufu.

¹⁶ Nshọo alị ọphu bụ nwata nshii bụ eze ẹphe; ndu ishi ẹphe aburu ndu, bụ ori gwoogwoo eteje ẹphe lẹ mgbenya. ¹⁷ Onu-oma bụ kẹ nggube alị ọphu eze ngu shi l'oke ufu; ndu ishi ẹphe aburu ndu erije nri l'ògè iya; k'ọphu ike a-dụ ẹphe; ẹ-tọ bụdu t'ọ gvụ l'ite.

¹⁸ Ọ kwa onye ẹnyiru; bẹ ụlo iya ezeje; bụru onye chiru ẹka ye l'ifu ụtakfu; bẹ ụlo iya eshije eshishi.

¹⁹ Iphe eemeje l'oge eswe-iphe bu ote eswa. Iphe mee emejekwanu bu t'ehu tso madzu ena. Obekwanu l'o bu okpoga gude iphemiphe obule.

²⁰ Be ephukwa onye eze iphu; m'o -ruhuru; o buru l'i riru iya ariri. Ophu be ephukwa onye nweru iphe iphu; m'o -ruhuru; i nodu l'ime ulo ngu; kele nwenu, ephe l'eli; me ophu nweru ebà e-jekwa je edoo.

11

Umere onye, kwaru enya

¹ Chita nri ngu ye le mini; a -nolephu ujiku olemole; yo laphutaru ngu azu. ² Hata iphe ngu keeru umadzu esaa; mbu keeru iya umadzu esato; ke l'e ti madu egbe iphe-ehuka e-mekochaa bya le mgboko.

³ Igwe -rua ji ali; kwaphu eliphe; be o-chiru mini. Oshi, ada adada; m'o -daru laa l'uzo ohuda; m'o daru laa l'uzo isheli; kwaphu eke o daru; be o-daburu. ⁴ Onye ele ege pherephere ephe te emebekwa iphe l'ali. Onye elekwanu igwe enya l'ifu ta akpatakwa iphe l'okfu iya. ⁵ O bu ege e ti madu uzo, pherephere eshije; ti ma ege nwata eshije emo nne iya l'epho; bu ege oru Nchileke te edoobe ngu enya; mbu Nchileke, bu iya meru iphemiphe obule. ⁶ Kua iphe iiku akuku l'utsu; ba achikwaru aka ye l'utakfu l'uřennyashi; ke l'e ti madu ophu e-mekochaa mee ohuma; ?bu owaa; t'o bu ophu; t'o bu l'ephe ebo e-mekochaa mee ohuma.

⁷ Iphoro dukwa mma; yo dujekwaphu madzu mma t'o phu enyanwu. ⁸ O -buru le madzu karu

nka; lilihu alilihu; t'ehu tsojekwa onye ono ena-a. Olobu; t'o nyatakwa le nchi e-jihuru iya; teke ono a-nokwaphu ulori ege ono. Iphe bu iphe a-byanu bukotakwa ori aphu.

Nyatakwa onye meru ngu nu nta-a, i bu nwokorobya

⁹ T'ehu tsokwaa ngu ena; nggube nwokorobya; nta-a, i bukwadua nwata. T'ehu tsojekwa ngu ena teke ehu nwata nokwadu ngu-a. Tsojekwa iphe obu ngu akoru ngu; me iphe enya ngu phuru. Olobu; t'o dokwa ngu enya l'iphemiphe obule ono; be Nchileke e-mekochakwa jia ngu aji iya.

¹⁰ Oo ya bu; haa oku welengu; tuko iphe bu iphe aghaswashi ngu ehu gwobe; ke l'evuvuta uke tukokwa buru ori aphu.

12

¹ Nyatakwa onye, keru ngu nu; teke i nokwadu l'okorobya; mbu temanu ejo uboku ono abya; mbu afa ono, ii-wata okfu: L'iphe ono l'o ha ta dukwa ophu atsokwadu ngu ena. ² Teke ono; be enyanwu; iphoro; onwa; me mkpoko kodo e-jikputa ngu l'enya; mgboko aguphohu ngu l'enya l'o bu teke igwe chigeru mini. ³ Teke ono; be ndu eche ufu a-nmahu kpakpakpa; ndu bu mkparawa ekpulahaa ekpukpu. Ndu akwo nri akwo-buhu iya; ke l'ephe ta hadu l'igwe. Ndu eshije le windo pyofu enya awata ophu inyoki-inyoki. ⁴ Teke aa-gu-chishi onoguzo mkpukpu. Iphe eegwe egwegwe adalaha ngu eringe-eringe; mbu teke bu: nwenu -raa ora;

nggu akfu-lihu. Obu l'olu egvu ephe a-nodu ada ote-nya ote-nya. ⁵ Teke ono; be madzu a-nodu atsu egvu onyihu eli ugvu; l'atsukwaphu egvu oswe l'esu-uzo; mbu teke oshi alumundu atsu igu; igube l'akpuwa onwiya akpukpu; to nwehe iphe egu iya agukwadu iya. Ono teke madzu a-la eke oo-no jeyewaru; ndu ekwa arawa iya ru le mgbadamgba ogologo. ⁶ Nyatakwa onye meru ngu nu; temanu a ghabua udo ono, e gude mkpola-ocha swia ono; mbu teke e ta tukpodua okwa mkpola-ododo ono; ite ta tukpohuwa le nwogvu; ta nyakwoshiwa igwe, eegudeje eseta mini le welu. ⁷ O bu teke ono; be eja a-laru l'ali, bu eke o shi; ume ndzu alakfushia Nchileke, bu onye nuru iya nu.

⁸ "Iphemiphe obule tuko buru ori aphu! Ono iphe O-zi-iphe ekfu. Iphemiphe obule tuko buru ori aphu!"

Mkpochi-ishi iya

⁹ E to bulekwa l'onye ziru iphe-a bu onye maru iphe; obenu l'o meru ndu odo; ephe amaru iphe. O riru oriri; voshia iphe avoshi; bya anmashia etu doo giriri. ¹⁰ O-zi-iphe toru nwehu foo okfu afofo; fota okfu, gbaru l'ekfukfu; k'ophu bu l'iphe o deru bu iphe gbaru nu; buru oswi-okfu. ¹¹ Okfu onye maru iphe dukwa l'o bu mgboro, unwu-eswi egudeje eche eswi. Yo buru ege nturu, akpojeru gungugungu bu ege etu, Onye Eche Aturu nmaru angujeru.

¹² Oo ya bu; nwa mu; sefukwa eka l'iphe e-ta budu iphe-a; mu ezi-a.

Ode ẹkwo te nwekwa agvugvu; ọgunuka ẹkwo l'achi ike.

¹³ Nta-a b'e gudewa nchi nukota iya l'ọ ha. Mkpochi-ishi iya aburu: Tsuje Nchileke egvu; nggu emeje iphe ọ sọru t'i mee! Kẹ l'ọ bu iya bu iphe gbaru madzọ l'ememe. ¹⁴ Kẹ l'iphemiphe ọbule, madzọ eme; bẹ Nchileke e-kpe iya ikpe; mbu jeye l'iphe bu iphe madzọ meru l'edomi; ọphu, du mma; me ọphu, du eji.

Bayiburu Ikwo
Ikwo: Bayiburu Ikwo Bible

copyright © 2014 Wycliffe Bible Translators, Inc.

Language: (Ikwo)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

3867ef4e-3384-5ab4-a937-63476bb8a7bb